

四庫全書

經部

欽定四庫全書

儀禮集釋卷二十六

特牲饋食禮第十五

鄭目錄云特牲饋食之禮謂諸侯之士祭祖禰非天

子之士而于五禮屬吉禮

案此條有脫誤釋文引鄭云諸侯之士以歲時祭其

祖廟之禮又疏云鄭知非天子之士而云諸侯之士者似釋文所引乃鄭目錄本文此云非天子之士及而字皆疏內字訛入注文于五禮屬吉禮下又脫大戴第七小戴第十三別錄第十五凡十四字

釋曰諸侯之士祭其祖禰之禮特牲一豕也韋昭曰

凡牲一為特二為牢曲禮曰凡祭大夫以索牛士以羊豕者謂天子之大夫士

特牲饋食之禮不諏日

鄭注祭祀自孰始曰饋食饋食者食道也諏謀也士賤職褻時至事暇可以祭則筮其日矣不如少牢大

夫先與有司于廟門諏丁巳之日今文諏皆為詛

案今

注疏本脫此六字

釋曰饋食薦孰也大夫士之祭不裸不薦血腥而自

薦孰始故名其禮曰饋食天子諸侯薦孰以前有裸
鬯薦血腥之禮

及筮日主人冠端玄即位于門外西面

鄭注冠端玄冠玄端下言玄者玄冠有不玄端者
門謂廟門

釋曰玄冠一冠冠玄端朝服二服士冠禮言筮于廟
門此祭于廟筮于廟門可知筮日者孝子不知鬼神
降格之期故因卜筮以請敬之至也

子姓兄弟如主人之服立于主人之南西面北上

鄭注所祭者之子孫言子姓者子之所生小宗祭而兄弟皆來與焉宗子祭則族人皆侍

釋曰姓之言生也兄弟猶言族親也祭統曰有事于太廟則羣昭羣穆咸在而不失其倫此之謂親疏之殺

有司羣執事如兄弟服東面北上

鄭注士之屬吏也

席于門中闕西闕外

鄭注為筮人設之也古文闕作𡩶

衆衆今注疏本訛作衆

闕作

蹇

筮人取筮于西塾執之東面受命于主人

鄭注筮人官名也筮問也取其所用問神明者謂著也

釋曰塾門側之堂士冠禮筮饌于西塾

宰自主人之左贊命命曰孝孫某筮來日某諏此某事

適其皇祖某子尚饗

鄭注宰羣吏之長自由也贊佐也達也贊命由左者為神求變也士祭曰歲事此言某事又不言妃者容大祥之後禫月之吉祭皇居也言君祖者尊之也某子者祖字也伯子仲子尚庶幾也

釋曰郊特牲曰祭稱孝孫孝子以其義稱也禫月之吉祭猶未配喪祭又不言歲事故空其文兼見此祭少牢饋食禮曰用薦歲事以其妃配此下宿賓辭亦

曰薦歲事

筮者許諾還即席西面坐卦者在左卒筮寫卦筮者執以示主人

鄭注士之筮者坐著短由便卦者主畫地識爻爻備以方寫之

釋曰三正記曰天子著長九尺諸侯七尺大夫五尺士三尺少牢禮立筮

主人受視反之

鄭注反還

筮者還東面長占卒告于主人占曰吉

鄭注長占以其屬之長幼旅占之

若不吉則筮遠日如初儀

鄭注遠日旬之外日

釋曰曲禮云旬之內曰近某日旬之外曰遠某日上
旬內筮不吉則筮中旬不吉復筮下旬復不吉則止
大夫以上則前一旬筮之

宗人告事畢前期三日之朝筮尸如求日之儀命筮曰孝
孫某諏此某事適其皇祖某子筮某之某為尸尚饗

鄭注三日者容宿賓視濯也某之某者字尸父而名尸
連言其親庶幾其馮依之也大夫士以孫之倫為尸

釋曰祭前二日宿賓前一日視濯曲禮曰為人子者祭
祀不為尸則尸筮無父者天子諸侯之祭亦用孫之倫
為尸取有爵者為之

乃宿尸

鄭注宿讀為肅肅進也進之者使知祭日當來古文宿皆作羞凡宿或作速記作肅周禮亦作宿

釋曰速賓肅客宿視滌濯是也乃緩辭宿尸宿賓同日主人立于尸外門外子姓兄弟立于主人之後北面東上鄭注不東面者來不為賓客子姓立于主人之後上當其後

釋曰祭統曰孫為王父尸所使為尸者于祭者子行也父北面而事之所以明子事父之道也

尸如主人服出門左西面

鄭注不敢南面當尊

主人辟皆東面北上

鄭注順尸

主人再拜尸答拜

鄭注主人先拜尊尸

宗人擯辭如初卒曰筮子為某尸占曰吉敢宿

鄭注宗人擯者釋主人之辭如初者如宰贊命筮尸

之辭卒曰者著其辭所易也今文無敢

案今注疏本脫此四字

祝許諾致命

鄭注受宗人辭許之傳命于尸始宗人祝北面至于傳命皆西面受命東面釋之

釋曰始時宗人祝從主人北面

尸許諾主人再拜稽首

鄭注其許亦宗人受于祝而告主人

尸入主人退

鄭注相揖而去尸不拜送尸尊

宿賓賓如主人服出門左西面再拜主人東面答再拜
宗人擯曰某薦歲事吾子將涖之敢宿

鄭注薦進也涖臨也言吾子將臨知賓在有司中令
特肅之尊賓耳

釋曰賓即筮時有司知有祭事矣不筮賓者主人為
獻主賓助祭而已

賓曰某敢不敬從主人再拜賓答拜主人退賓拜送厥

明夕陳鼎于門外北面上有鼎

鄭注厥其也宿賓之明日夕門外北面當門古文鼎
為密

釋曰不言門之東西知當門

於在其南南順實獸于其上東首

鄭注順猶從也於之制如今大木輦矣上有四周下
無足獸腊也

牲在其西北首東足

鄭注其西櫨西也東足者尚右也牲不用櫨以其生
釋曰牲豕也縛其足寢左

設洗于阼階東南壺禁在東序豆籩鉶在東房南上几
席兩敦在西堂

鄭注東房房中之東當夾北西堂西夾之前近南耳

案西夾下各本衍室
字據疏引注文刪正

釋曰大夫士直曰房此言東房明在房中之東當東
夾室之北也西堂西廂也釋宮曰室有東西廂曰廟

郭曰夾室前堂

主人及子姓兄弟即位于門東如初

鄭注初筮位也

賓及衆賓即位于門西東面北上

鄭注不蒙如初者以宰在而宗人祝不在

案宰今注疏本訛作賓

釋曰賓及衆賓即筮時有司羣執事也筮時祝宗人在其中惟宰在門東今宰在衆賓中祝宗人別自為位與筮位異

宗人祝立于賓西北東面南上

鄭注事彌至位彌異宗人祝于祭宜近席

主人再拜賓荅再拜三拜衆賓衆賓皆荅再拜

鄭注衆賓再拜者士賤旅之得備禮也

釋曰少牢下篇大夫三拜衆賓衆賓皆荅一拜不再

拜者辟國君

主人揖入兄弟從賓及衆賓即位于堂下如外位

鄭注為視濯也

宗人升自西階視壺濯及豆籩反降東北面告濯具

鄭注濯溉也不言敦鉶者省文也東北面告緣賓意欲聞也言濯具不言絮以有几席

釋曰几席不濯告具而已

賓出主人出皆復外位

鄭注為視牲也今文復為反

案今注疏本脫此五字

宗人視牲告充雍正作豕

鄭注充猶肥也雍正官名也北面以策動作豕視聲氣

釋曰周禮充人展牲則告拴牲無疾則聲氣和

宗人舉獸尾告備舉鼎鬯告絜

鄭注備具

請期曰羹飪

鄭注肉謂之羹飪孰也謂明日質明時而曰肉孰重
豫勞賓宗人既得期西北面告賓有司

釋曰少牢饋食禮為期宗人北面

告事畢賓出主人拜送夙興主人服如初立于門外東

方南面視側殺

鄭注夙早也興起也主人服如初則其餘有不玄端者側殺殺一牲也

釋曰不記賓及兄弟服朝服惟尸祝佐食同主人服玄端側猶特也

主婦視饌饌于西堂下

鄭注炊黍稷曰饌宗婦為之饌竈也西堂下者堂之西下也近西壁南齊于坵古文饌作糝周禮作饌

釋曰坫在堂角既夕記曰設楹于東堂下南順齊坫

案坫上各本有于字釋文舉齊坫二字可證于字乃衍文如在東西堂下者皆齊

于坫

亨于門外東方西面北上

鄭注亨煮也煮豕魚腊以鉶各一饗詩云誰能亨魚

溉之釜鬻

美飪實鼎陳于門外如初

鄭注初視濯也

尊于戶東玄酒在西

鄭注戶東室戶東玄酒在西尚之凡尊酌者在左

實豆籩鉶陳于房中如初

鄭注如初者取而實之既而反之

執事之俎陳于階間二列北上

鄭注執事謂有司及兄弟二列者因其位在東西祝

主人主婦之俎亦存焉不升鼎者異于神

盛兩敦陳于西堂藉用萑几席陳于西堂如初

鄭注盛黍稷者宗婦也萑細葦古文用為于

尸盥匱水實于槃中簞巾在門內之右

鄭注設盥水及巾尸尊不就洗又不揮門內之右象
洗在東統于門東西上凡鄉內以入為左右鄉外以
出為左右

釋曰尸盥在門右据鄉內也揮振去水也春秋傳曰
奉匱沃盥既而揮之

祝筵几于室中東面

鄭注為神敷席也至此使祝接神

釋曰祭統曰鋪筵設同几為依神也筵于室中西南隅

主婦纚笄宵衣立于房中南面

鄭注主婦主人之妻雖姑存猶使之主祭祀纚笄首服宵綺屬也此衣染之以黑其繒本名宵詩有素衣朱宵記有玄宵衣凡婦人助祭者同服也內則曰舅沒則姑老冢婦所祭祀賓客每事必請於姑

釋曰祭統曰夫祭也者必夫婦親之所以備外內之
官也官備則具備

主人及賓兄弟羣執事即位于門外如初宗人告有司
具

鄭注具猶辨也

主人拜賓如初揖入即位如初

鄭注初視濯也

佐食北面立于中庭

鄭注佐食賓佐尸食者立于宗人之西

釋曰虞禮主人即位于堂如反哭東面宗人西階前
北面詔主人此禮主人位堂下西面宗人當在阼階
南擯主人知佐食在主人之西

主人及祝升祝先入主人從西面于戶內

鄭注祝先入接神宜在前也少牢饋食禮曰祝盥于
洗升自西階主人盥升自阼階祝先入南面

主婦盥于房中薦兩豆葵菹蜎醢醢在北

鄭注主婦盥盥于內洗昏禮婦洗在北堂直室東隅
釋曰薦豆于奧席前

宗人遣佐食及執事盥出

鄭注命之盥出當助主人及賓舉鼎

主人降及賓盥出主人在右及佐食舉牲鼎賓長在右
及執事舉魚腊鼎除鼎

鄭注及與也主人在右統于東主人與佐食者賓尊
不載少牢饋食禮魚用鮒腊用麋士腊用兔

釋曰入以東為右賓不偶主人者左人當載載賤者之事曲禮曰兔曰明視

宗人執畢先入當阼階南面

鄭注畢狀如叉蓋為其似畢星取名焉主人親舉宗人則執畢導之既錯又以畢臨柩載備失脫也雜記

曰柩用桑長三尺畢用桑三尺

案三上今注疏本有長字刊其本

與末柩畢同材明矣今此柩用棘心則畢亦用棘心舊說云畢以御他神物

案以今注疏本訛作似

神物惡桑又則

少牢饋食及虞無又何哉此無又者乃主人不親舉耳少牢大夫祭不親舉虞喪祭也主人未執事祔練祥執事用桑又自此純吉用棘心又

鼎西面錯右人抽局委于鼎北

鄭注右人謂主人及二賓既錯皆西面俟也

贊者錯俎加匕

鄭注贊者執俎及匕從鼎入者其錯俎東縮加匕東

枋

案今注疏本作柄

既則退而左人北面也

釋曰左人北面于其南載之昏禮曰北面載少牢饋
食禮俎皆設于鼎

乃杞

鄭注右人也尊者于事指使可也左人載之

佐食升肝俎鼎之設于阼階西

鄭注肝俎

案今注疏
本脫俎字

謂心舌之俎也郊特牲曰肝之

為言敬也言主人之所以敬尸之俎古文鼎皆作密

卒載加匕于鼎

鄭注卒已也已載畢亦加焉

主人升入復位俎入設于豆東魚次腊特于俎北

鄭注入設俎載者腊特饌要方也凡饌必方者明食
味人之性所以正

主婦設兩敦黍稷于俎南西上及兩鉶鉶芼設于豆南

南陳

案各本脫一鉶
字據唐石經補

鄭注宗婦不贊敦鉶者以其少可親之芼菜也

祝洗酌奠奠于鉶南遂命佐食啟會佐食啟會卻于敦

南出立于戶西南面

案今注疏本脫戶字唐石經亦有

鄭注酌奠奠其爵解也少牢饋食禮啟會乃奠之

釋曰會敷蓋也卻仰也

主人再拜稽首祝在左

鄭注稽首服之甚者祝在左當為主人釋辭于神也
祝祝曰孝孫某敢用剛鬣嘉薦普淖用薦某事于皇
祖某子尚饗

卒祝主人再拜稽首祝迎尸于門外

鄭注尸自外來代主人接之就其次而請不拜不敢與尊者為禮周禮掌次凡祭祀張尸次

主人降立于阼階東

鄭注主人不迎尸成尸尊尸所祭者之孫也祖之尸則主人乃宗子禰之尸則主人乃父道事神之禮廟中而已出迎則為厭

釋曰祭統曰君迎牲而不迎尸別嫌也尸在廟門外則疑于臣在廟中則全于君君在廟門外則疑于君

入廟門則全于子

尸入門左北面盥宗人授巾

鄭注侍盥者執其器就之執簞者不授巾賤也宗人授巾庭長尊少牢饋食禮曰祝先入門右尸入門左釋曰尸盥在門右侍盥者執以之門左就尸

尸至于階祝延尸尸升入祝先主人從

鄭注延進在後詔侑曰延禮器所謂詔侑武方者也少牢饋食禮曰尸升自西階入祝從主人升自阼階

祝先入主人從

釋曰無方無常也

尸即席坐主人拜妥尸

鄭注妥妥坐也

釋曰郊特牲曰舉笙角詔妥妥尸古者尸無事則立有事而后坐也

尸荅拜執奠祝饗主人拜如初

鄭注饗勸強之也其辭取于士虞記則宜云孝孫某

圭為孝薦之饗舊說云明薦之

祝命按祭尸左執解右取菹換醢

案各本作換于醢釋文舉換醢二字可證

于字乃衍文祭于豆間

鄭注命詔尸也按祭祭神食也士虞禮古文曰祝命

佐食隋祭

案隋今注疏本訛作墮下同

周禮曰既祭則藏其隋隋

與按讀同耳今文改按皆為綏古文此皆為按祭也

換醢者染于醢

釋曰鄉者設饌厭飫神謂之陰厭

案此下原本缺

佐食取黍稷肺祭授尸尸祭之祭酒啐酒告旨主人拜尸奠解答拜

鄭注肺祭剗肺也旨美也祭酒穀味之芬芳者齊敬

共之惟恐不美告之美

案美上今注疏本有以字

達其心明神享

之

釋曰尸俎具有離肺剗肺此所祭者剗肺郊特牲曰祭肺肝心貴氣主也明堂位曰夏后氏祭心殷祭肝周祭肺

祭鉶嘗之告旨主人拜尸荅再拜

鄭注鉶肉味之有菜和者曲禮曰客祭羹主人辭不能亨

釋曰鉶羹有菜和故告旨盛之鉶器故名鉶羹
祝命爾敦佐食爾黍稷于席上

鄭注爾近也近之便尸之食也

設大羹滂于醢北

鄭注大羹滂煮肉汁也不和貴其質設之所以敬尸

也不祭不齊大羹不為神非盛者也士虞禮曰大羹
清自門入今文清皆為汁

釋曰士虞禮記曰無尸則無大羹清大羹在左者神
禮變于食

舉肺脊以授尸尸受振祭齊之左執之

鄭注肺氣之主也脊正體之貴者先食啗之所以導
食通氣

釋曰肺離肺也周禮九祭五曰振祭六曰擣祭擣祭

者擣于醢以祭不食也振祭者將食既擣必振乃祭也黍稷牢肉魚皆擣于醢

乃食食舉

鄭注舉言食者明凡解體皆連肉

釋曰食舉即肺脊也食必先舉之故曰舉以其可食故又曰食舉凡體皆連肉以骨為主耳

主人羞胔俎于腊北

鄭注胔俎主于尸主人親羞敬也神俎不親設者貴

得賓客以神事其先

尸三飯告飽祝侑主人拜

鄭注三飯告飽禮一成也侑勸也或曰又勸之使又

食少牢饋食禮侑辭曰皇尸未實侑也

案今注疏本脫也字

釋曰實飽也詩楚茨曰以享以祀以妥以侑

佐食舉幹尸受振祭濟之佐食受加于胾俎舉獸幹魚
一亦如之

鄭注幹長脅也獸腊其體數與牲同

釋曰正脅曰幹此禮無正脅則幹者通謂長脅公羊傳曰擗幹而殺之

尸實舉于菹豆

鄭注為將食庶羞舉謂肺脊

佐食羞庶羞四豆設于左南上有醢

鄭注庶衆也衆羞以豕肉所以為異味四豆者醢炙載醢南上者以醢炙為上以有醢不得綏也

釋曰王制曰庶羞不踰牡案公食大夫禮醢與載炙

綽設此進一醢故不得綽

尸又三飯告飽祝侑之如初

鄭注禮再成也

舉骼及獸魚如初尸又三飯告飽祝侑之如初

鄭注禮三成獸魚如初者獸骼魚一也

舉肩及獸魚如初

鄭注不復飯者三三者士之禮大成也舉先正脊後肩自上而卻下綽而前終始之次也

釋曰案少牢饋食禮載牲體之次肩臂臠膊胙在俎
兩端脊脅肺在上其序肩脊脅胙先舉正脊自上也
次舉脅卻也後舉胙下綽也終舉肩前也尸舉牲體
如綽也

佐食盛肝俎俎釋三个

鄭注佐食取牲魚腊之餘盛于肝俎將以歸尸俎釋
三个為改饌于西北隅遺之所釋者牲腊則正脊一
骨長脅一骨及臠也魚則三頭而已个猶枚也今俗

言物數有云若干個

案今注疏本作有若干個者

此讀然

釋曰案下記尸俎右肩臂肱肱肱正脊二骨橫脊長脊二骨短脊今已舉肩肱正脊一骨長脊一骨前脰宜盛臂後脰宜盛肱脊脊宜盛橫脊短脊知所釋者正脊一骨長脊一骨及肱

舉肺脊加于所俎反黍稷于其所

鄭注尸授佐食佐食受而加反之也肺脊初在菹豆

主人洗角升酌醕尸

鄭注醕猶衍也是獻尸也謂之醕者

案謂之二字今注疏本作云字

尸既卒食又欲頤衍養樂之不用爵者下大夫也因

父子之道質而用角角加人事略者

案者今注疏本訛作也

今

文醕皆為酌

釋曰凡觴一升曰爵二升曰觶三升曰解四升曰角

五升曰散少牢饋食禮醕尸用爵此辟大夫不用爵

次當用觶而用角者角用功少象質也

尸拜受主人拜送尸祭酒啐酒賓長以肝從

鄭注肝肝炙也今文曰啐之

案今注疏本脫此五字

古文無長

釋曰羞肝亦以祭右鹽

尸左執角右取肝換于鹽振祭嚌之加于菹豆卒角祝受尸角曰送爵皇尸卒爵主人拜尸荅拜

鄭注曰送爵者節主人拜

祝酌授尸尸以醋主人

鄭注醋報也祝酌不洗尸不親酌尊尸也尸親醋相

報之義

案今注疏本脫此七字

古文醋作酢

主人拜受角尸拜送主人退佐食授妥祭

案妥各本訛作按據注訂

正

鄭注退者進受爵反位妥亦當為按

案今注疏本脫此五字

尸

將嘏主人佐食授之按祭亦使祭尸食也其授祭亦

取黍稷肺祭今文或皆改妥作按

案今注疏本作今文妥作綏

主人坐左執角受祭祭之祭酒卒酒進聽嘏

鄭注聽猶待也受福曰嘏嘏長也大也待尸授之長

大之福

案此下今注疏本有也字

佐食搏黍授祝祝授尸尸受以菹豆執以親啇主人

鄭注獨用黍者食之主其辭則少牢饋食禮有焉

主人左執角再拜稽首受復位詩懷之實于左袂挂于季指卒角拜尸荅拜

鄭注詩猶承也謂奉納之懷中季少也實于左袂挂祛以小指者便卒角也少牢饋食禮曰興受黍坐振

濟之古文挂作卦

案今注疏本脱此五字

釋曰內則曰詩負之詩含神霧曰詩持也以手維持則承奉之義袂袖也祛袖口

主人出寫嗇于房祝以籩受

鄭注變黍言嗇

案言今注疏本訛作以

因事託成欲其重稼嗇

嗇者農力之成功

筵祝南面

鄭注主人自房還時

主人酌獻祝祝拜受角主人拜送設醴醢俎

鄭注行神惠也先獻祝以接神尊之苴醢皆主婦設之佐食設俎

釋曰神坐及亞獻致爵之籩豆皆主婦設之少牢饋食禮主人獻祝佐食設俎

祝左執角祭豆興取肺坐祭臠之興加于俎坐祭酒啐酒以肝從祝左執角右取肝換于鹽振祭臠之加于俎卒角拜主人荅拜受角酌獻佐食佐食北面拜受角主人拜送佐食坐祭卒角拜主人荅拜受角降反于篚升

入復位

釋曰下記祝俎離肺則祝絕肺以祭此不見者省文
主婦洗爵于房酌亞獻尸

鄭注亞次也次猶貳主婦貳獻不夾拜者士妻儀簡
耳

釋曰爵房中爵也少牢饋食禮主婦拜獻尸尸拜受
主婦拜送

尸拜受主婦北面拜送

鄭注北面拜者辟內子也大夫之妻拜於主人之北
西面

宗婦執兩籩戶外坐主婦受設于敦南

鄭注兩籩束粟束在西

釋曰士虞禮主婦亞獻尸自反兩籩束粟設于會南
束在西周禮九嬪凡祭祀贊玉盥贊后薦徹豆籩
祝贊籩祭尸受祭之祭酒啐酒

鄭注籩祭束粟之祭也其祭之亦于豆祭

釋曰祝贊者猶前命按祭也籩豆同祭于豆間少牢下篇曰尸取豐蕢白黑兼祭于豆祭

兄弟長以燔從尸受振祭濟之反之

鄭注燔炙肉也

釋曰反之反于長兄弟楚茨曰執爨踏踏為俎孔碩或燔或炙

羞燔者受加于所出

鄭注出者俟後事也

釋曰俟羞燔于祝也

尸卒爵祝受爵命送如初

鄭注送者送卒爵

酢如主人儀

鄭注尸酢主婦如主人儀者自祝酌至尸拜送如酢
主人也不易爵辟內子

釋曰上尸酢主人不易爵此如之亦不易爵也禮男
女不相襲爵少牢饋食禮尸酢主婦祝易爵洗以授

尸此襲爵者辟大夫之妻

主婦適房南面佐食授祭主婦左執爵右撫祭祭酒啐酒入卒爵如主人儀

鄭注撫授祭示親祭佐食不授而祭于地亦儀簡也入室卒爵于尊者前成禮明受惠也

釋曰少牢禮主婦受祭祭之

獻祝籩燭從如初儀及佐食如初卒以爵入于房

鄭注及佐食如初如其獻佐食則拜主人之北西面

也

釋曰佐食北面受獻主婦不宜同面拜送言如初明
同主人西面拜與內子禮同

賓三獻如初燭從如初爵止

鄭注初亞獻也尸止爵者三獻禮成欲神惠之均于
室中是以奠而獻之



欽定四庫全書

經部

儀禮集釋卷二十七

詳校官監察御史臣曹坦

侍讀臣孫球覆勘

謄錄監生臣任溥

謄錄監生臣黃鍾

欽定四庫全書

儀禮集釋卷二十七

宋 李如圭 撰

特牲饋食禮

席于戶內

鄭注為主婦鋪之西面席自房來

主婦洗爵酌致爵于主人主人拜受爵主婦送爵

鄭注主婦拜拜于北面也今文曰主婦洗酌爵

主婦贊豆如初主婦受設兩豆兩籩

鄭注初贊亞獻也主婦薦兩籩東面也

俎入設

鄭注佐食設之

主人左執爵祭薦宗人贊祭奠爵興取肺坐絕祭臠之
興加于俎坐扱手祭酒啐酒

鄭注絕肺祭之者以離肺長也少儀曰牛羊之肺離
而不提心豕亦然扱拭也扱手者為絕肺染汙也忖
肺不扱手古文扱皆作說

釋曰忖肺忖切之直取以祭離肺四面離割之不絕
其中央少許時絕之以祭下記主人以下俎皆離肺
無刊肺

肝從左執爵取肝換于鹽坐振祭濟之宗人受加于俎
燔亦如之興席末坐卒爵拜

鄭注于席末坐卒爵敬也一酌而備再從而次之示
均

釋曰尸再獻而具肝從主人一酌而肝燔從與尸均

坐振祭重出坐字疑

主婦荅拜受爵酌醋左執爵拜主人荅拜坐祭立飲卒爵拜主人荅拜主婦出反于房

釋曰主婦醋不更爵殺也

主人降洗酌致爵于主婦席于房中南面主婦拜受爵主人西面荅拜主婦薦豆俎從獻皆如主人主人更爵酌醋卒爵降實爵于篚入復位

鄭注主人更爵自酢男子不承婦爵也祭統曰夫婦

相授受不相襲處酢必易爵明夫婦之別古文更為

受

案今注疏本訛作今文授為受

釋曰更爵更房內之爵也庭篚惟有二爵其一獻尸爵止其一主人致爵于主婦少牢下篇賓致爵于主婦之俎亦佐食設之

三獻作止爵

鄭注賓也謂三獻者以事命之作起也舊說云賓入戶北面曰皇尸請舉爵

尸卒爵酢酌獻祝及佐食洗爵酌致于主人主婦燭從皆如初更爵酢于主人卒復位

鄭注洗乃致爵為異事新之燭從皆如初者如亞獻及主人主婦致爵也凡獻佐食皆無從其薦俎獻兄弟以齒設之賓更爵自酢亦不承婦人爵今文曰洗致古文更為受

案今注疏本脫此十字

釋曰下記佐食旅旅齒于兄弟故其薦俎亦然賓三獻節中有十一爵獻尸一主婦致爵于主人二主婦

自酢三主人致爵于主婦四主人自酢五尸卒爵酢
賓六賓獻祝七獻佐食八賓致爵于主人九致爵于
主婦十賓酢于主人十一

主人降阼階西面拜賓如初洗

鄭注拜賓而洗爵為將獻之如初如視濯時主人再
拜賓荅拜三拜衆賓衆賓荅再拜者

賓辭洗卒洗揖讓升酌西階上獻賓賓北面拜受爵主
人在右荅拜

鄭注就賓拜者此禮不主于尊也賓卑則不專階主

人在右統于其位今文無洗

案今注疏本脫此四字

釋曰賓有司耳不得專階故主人就而獻之主人之位
位在東

薦脯醢設折俎

鄭注凡節解者皆曰折俎不言其體略云折俎非貴
體也上賓骼衆賓儀公有司設之

釋曰少牢下篇曰司士設賓俎羊骼衆賓賓其胾體儀

也儀者儀度可用者用之

賓左執爵祭豆奠爵興取肺坐絕祭齎之興加于俎坐
執手祭酒卒爵拜主人荅拜受爵酌酢奠爵拜賓荅拜
鄭注主人酌自酢者賓不敢敵主人主人達其意

主人坐祭卒爵拜賓荅拜揖執祭以降西面奠于其位
位如初薦俎從設

鄭注位如初復其位東面少牢饋食禮宰夫執薦以
從設于祭東司士執俎以從設于薦東是則皆公有

司為之與

釋曰祭脯肺

衆賓升拜受爵坐祭立飲薦俎設于其位辯主人備荅拜焉降實爵于筐

鄭注衆賓立飲賤不備禮鄉飲酒記曰立卒爵者不拜既爵備盡盡人之荅拜

釋曰坊記曰尸飲三衆賓飲一示民有上下也因其酒肉聚其宗族以教民睦也

尊兩壺于阼階東加勺南枋西方亦如之

鄭注為酬賓及兄弟行神惠不酌上尊卑異之就其
位尊之兩壺皆酒優之先尊東方示惠由近禮運曰
澄酒在下

釋曰旅酬禮褻不敢與神靈共尊故就賓及兄弟之
位尊之不用玄酒澄酒在下人君禮也案司尊彝四
時之祭皆有罍諸臣之所酢少牢饋食禮上下大夫
堂下皆無尊者辟人君士卑不嫌與人君同

主人洗解酌于西方之尊西階前北面酬賓賓在左

鄭注先酌西方者尊賓之義

主人奠解拜賓荅拜主人坐祭卒解拜賓荅拜主人洗解賓辭主人對卒洗酌西面賓北面拜

鄭注西面者鄉賓位立于西階之前賓所荅拜之東北

主人奠解于薦北

鄭注奠酬于薦左非為其不舉行神惠不可同于飲

酒

釋曰鄉飲酒記云凡奠者于左將舉于右

賓坐取觶還東面

案此下各本衍拜字考上經賓北面拜主人奠觶于薦北下云主人荅拜

荅賓北面之拜也賓坐取觶還東面下乃云賓奠觶于薦南賓方執觶在手不得拜明矣主人荅拜

賓奠觶于薦南揖復位

鄭注還東面就其位薦西奠觶薦南明將舉

釋曰揖復位則奠觶時少南于位

主人洗爵獻長兄弟于阼階上如賓儀

鄭注酬賓乃獻長兄弟者獻之禮成于酬先成賓禮此主人之義亦有薦胥設于位私人為之與

釋曰下記公有司獻次衆賓私臣獻次衆兄弟賓薦俎蓋公有司設之兄弟薦俎蓋私臣設之

洗獻衆兄弟如衆賓儀

鄭注獻卑而必為之洗者顯神惠此言如衆賓儀則如獻衆賓洗明矣

洗獻內兄弟于房中如獻衆兄弟之儀

鄭注內兄弟內賓宗婦也如衆兄弟如其拜受坐祭
立飲設薦俎于其位而立內賓其位在房中之尊北
案今注疏本脫其字不殊其長略婦人也有司徹曰主人洗獻
內賓于房中南面拜受爵

釋曰下記尊兩壺于房中西墉下內賓立于其北東
面南上宗婦北堂東面

主人西面荅拜更爵酢卒爵降實爵于筐入復位

鄭注爵辯乃自酢以初不殊其長也內賓之長亦南

面荅拜

長兄弟洗觶為加爵如初儀不及佐食洗致如初無從
鄭注大夫士三獻而禮成多之為加也不及佐食無
從殺也致致于主人主婦
衆賓長為加爵如初爵止

鄭注尸爵止者欲神惠之均于在庭

嗣舉奠盥入北面再拜稽首

鄭注嗣主人將為後者舉猶飲也使嗣子飲奠者將

傳重累之者大夫之嗣子不舉奠辟諸侯

釋曰奠鉶南所奠解也文王世子曰宗廟之中登餽獻受爵則以上嗣上嗣君子適長子也以此禮言之受爵謂嗣舉奠獻謂舉奠洗酌入餽謂宗人遺舉奠盥祝命之餽也大夫之嗣無此禮辟君

尸執奠進受復位祭酒啐酒尸舉肝舉奠左執解再拜稽首進受肝復位坐食肝卒解拜尸備荅拜焉

鄭注食肝受尊者賜不敢餘也備猶盡也每拜荅之

以尊者與卑者為禮略其文耳古文備為復

釋曰肝醢尸所從獻者舉奠者嗣也以事名之

舉奠洗酌入尸拜受舉奠答拜尸祭酒啐酒奠之舉奠
出復位

鄭注啐之者答其欲酢己也奠之者復神之奠觶嗣
齒于子姓凡非主人升降自西階

釋曰尸復神之奠觶故惟啐之與按祭同時

兄弟弟子洗酌于東方之尊酢階前北面舉觶于長兄

弟如主人酬賓儀

鄭注弟子後生也

宗人告祭胥

鄭注胥俎也所告者衆賓衆兄弟內賓也

案今注疏本兄弟上

脫一衆字獻時設薦俎于其位至此禮又殺告之祭使成

禮也其祭皆離肺不言登豆可知

乃羞

鄭注羞庶羞也下尸載醢豆而已此所羞者自祝主

人至于內賓無內羞

釋曰少牢下篇乃有內羞此庶羞降于尸無醢炙少牢下篇曰羞及私人辯

賓坐取觶阼階前北面酬長兄弟長兄弟在右

鄭注薦南奠觶

釋曰主人酬賓之觶

賓奠觶拜長兄弟荅拜賓立卒觶酌于其尊東面立長兄弟拜受觶賓北面荅拜揖復位

鄭注其尊長兄弟尊也此受酬者拜亦北面

長兄弟西階前北面衆賓長自左受旅如初

鄭注旅行也受行酬也初賓酬長兄弟

長兄弟卒解酌于其尊西面立受旅者拜受長兄弟北面答拜揖復位

釋曰其尊西面之尊

衆賓及衆兄弟交錯以辯皆如初儀

鄭注交錯猶言東西

釋曰楚茨曰獻酬交錯禮儀卒度笑語卒獲古者于旅也語謂此時

為加爵者作止爵如長兄弟之儀

鄭注于旅酬之間言作止爵明禮殺竝作

釋曰賓酬長兄弟長兄弟酬賓二觶繼舉至此禮殺故不俟其畢而作止爵

長兄弟酬賓如賓酬兄弟之儀以辯卒受者實觶于篚鄭注長兄弟酬賓亦坐取其奠觶此不言交錯以辯

賓之酬不言卒受者實解于筐明其相報禮終于此
其文省

釋曰長兄弟亦取兄弟弟子所舉之解酬賓以相報
故互文以見之

賓弟子及兄弟弟子洗各酌于其尊中庭北面西上舉
解于其長奠解拜長皆荅拜舉解者祭卒解拜長皆荅
拜舉解者洗各酌于其尊復初位長皆拜舉解者皆奠
解于薦右

鄭注奠解進奠之于薦右非神惠也今文曰奠于薦右

長皆執以興舉解者皆復位荅拜長皆奠解于其所皆揖其弟子弟子皆復其位

鄭注復其位者東西面位弟子舉解于其長所以序長幼教孝弟凡堂下拜亦皆北面

爵皆無算

鄭注算數也賓取解酬兄弟之黨長兄弟取解酬賓

之黨惟己所欲亦交錯以辨無次第之數因今接會使之交慰定好優勸之

利洗散獻于尸酢及祝如初儀降實散于篚

鄭注利佐食也言利以今進酒也更言獻者以利待尸禮將終宜一進酒嫌于加酒亦當三也不致爵禮又殺也

主人出立于戶外西面

鄭注事尸禮畢

祝東面告利成

鄭注利猶養也供養之禮成不言禮畢于尸聞之嫌尸謏祝前主人降

鄭注謏起也前猶導也少牢饋食禮曰祝入尸謏主人降立于阼階東西面祝先尸從遂出于廟門前尸之儀士虞之禮備矣

釋曰楚茨曰孝孫徂位工祝致告神具醉止皇尸載起致告告利成也

祝反及主人入復位命佐食徹尸俎俎出于廟門

鄭注俎所載于所俎少牢饋食禮曰有司受歸之

徹庶羞設于西序下

鄭注為將餽去之庶羞主為尸非神饌也尚書傳曰

宗室有事族人皆侍終日大宗已侍于賓奠然後燕

私燕私者何也祭已而與族人飲也

案今注疏本脫祭字

此徹

庶羞置西序下者為將以燕飲與然則自尸祝至于

兄弟之庶羞宗子以與族人燕飲于堂內賓宗婦之

庶羞主婦以燕飲于房

釋曰楚茨曰諸宰君婦廢徹不遲諸父兄弟備言燕私

筵對席佐食分簋鉶

鄭注為將餽分之也分簋者分敦黍于會為有對也敦有虞氏之器也周制士用之變敦言簋容同姓之士得從周制耳祭統曰餽者祭之末也不可不知也是故古之人有言曰善終者如始餽其是已是故古

之君子曰尸亦餽鬼神之餘

案此下今注疏本有也字

惠術也可

以觀政矣

宗人遣舉奠及長兄弟盟立于西階下東面北上祝命
嘗食養者舉奠許諾升入東面長兄弟對之皆坐佐食
授舉各一膚

鄭注命告也士使嗣子及兄弟養其惠不過族親也

案今注疏本脫也字

古文養皆作餽

釋曰養者舉膚降于尸也祭統曰尸謏君與卿四人餽

君起大夫六人餽大夫起士八人餽少牢饋食禮二
佐食及二賓長餽

主人西面再拜祝曰養有以也兩養奠舉于俎許諾皆
答拜

鄭注以讀如何其久也必有以也之以祝曰養

案曰今注

疏本訛作告

釋辭以戒之言女養乎此

案今注疏本脫乎字

當有所

以也以先祖有德而享于此祭其坐養其餘亦當以
之也少牢饋食禮不戒者非親昵也舊說曰主人拜

下養席南

若是者三

鄭注丁寧戒之

皆取舉祭食祭舉乃食祭鉶食舉

鄭注食乃祭鉶禮殺

釋曰食簋實也尸祭鉶當之乃爾黍

卒食主人降洗爵宰贊一爵主人升酌醕上養上養拜
受爵主人荅拜醕下養亦如之

鄭注少牢饋食禮曰贊者洗三爵酌

案今注疏本脫酌字

主人

受于戶內以授次養舊說云主人北面授下養爵

主人拜祝曰醕有與也如初儀

鄭注主人復拜為戒也與讀如諸侯以禮相與之與言女醕此當有所與也與者與兄弟也既知似先祖之德亦當與女兄弟謂教化之

兩養執爵拜

鄭注答主人也

祭酒卒爵拜主人荅拜兩養皆降實爵于篚上養洗爵升酌酢主人主人拜受爵

鄭注下養復兄弟位不復升也

上養即位坐荅拜

鄭注既授爵戶內乃就坐

主人坐祭卒爵拜上養荅拜受爵降實于篚主人出立于戶外西而

鄭注事餽者禮畢

祝命徹胾俎豆籩設于東序下

鄭注命命佐食胾俎主人之俎宗婦不徹豆籩徹禮略各有為而已設于東序下亦將燕也

祝執其俎以出東面于戶西

鄭注俟告利成少牢下篇曰祝告利成乃執俎以出宗婦徹祝豆籩入于房徹主婦薦俎

鄭注宗婦既竝徹徹其卑者士虞禮曰祝薦席徹入于房

佐食徹尸薦俎敦設于西北隅几在南扉用筵納一尊
佐食闔牖戶降

鄭注扉隱也不知神之所在或諸遠人乎尸諤而改
饌為幽闇庶其饗之所以為厭飫少牢饋食禮曰南
面如饋之設此所謂當室之白陽厭也則尸未入之
前為陰厭矣曾子問曰殤不備祭何謂陰厭陽厭也

案今注疏本
謂訛作為

釋曰釋宮曰西南隅謂之奧西北隅謂之屋漏郭璞

曰與者室中隱與之處孫炎曰屋漏者當室之白日
光所漏入也厭者無尸直厭飫神尸未入饌于與故
曰陰厭扉謂以席為障隱也祭時扉西北隅因謂西
北隅為扉喪大記曰取西北扉薪

祝告利成降出主人降即位宗人告事畢賓出主人送
于門外再拜

鄭注拜送賓也凡去者不答拜

佐食徹胾俎堂下俎畢出

鄭注記俎出節兄弟及衆賓自徹而出惟賓俎有司

徹歸之尊賓也

案也今注疏
本訛作者

釋曰賓出主人拜送明賓不自徹也曲禮曰凡祭于公者必自徹其俎

記特牲饋食其服皆朝服玄冠緇帶緇鞶

鄭注于祭服此也皆者謂賓及兄弟筮日筮尸親濯亦玄端至祭而朝服朝服者諸侯之臣與其君日視朝之服大夫以祭今賓兄弟緣孝子欲得嘉賓尊客

以事其祖禰故服之緇韠者下大夫之臣夙興主人服如初則固玄端

釋曰凡朝服素韠

惟尸祝佐食玄端玄裳黃裳雜裳可也皆爵韠

鄭注與主人同服周禮士之齊服有玄端素端然則玄裳上士也黃裳中士雜裳下士

釋曰可者惟其所當服服之

設洗南北以堂深東西當東榮

鄭注榮屋翼也

水在洗東

鄭注祖天地之左海

案左今注疏
本訛作右

篚在洗西南順實二爵二觚四觶一角一散

鄭注順從也言南從統于堂也二爵者為賓獻爵止

主婦當致也二觚長兄弟及衆賓長為加爵二人班

同宜接竝也四觶一酌奠其三長兄弟酬賓卒受者

與賓弟子兄弟弟子舉觶于其長禮殺事相接禮器

曰貴者獻以爵賤者獻以散尊者舉觶卑者舉角舊說云爵一升觶二升觶三升角四升散五升

釋曰賓獻尸之爵止主人當致爵于主婦故爵二長兄弟與衆賓長班同接竝為加爵宜各用一觶故觶二長兄弟酬賓之觶未奠于筐賓弟子及兄弟弟子已各舉觶于其長其一觶酌奠于鉶南故觶四

壺極禁饌于東序南順覆兩壺焉蓋在南明日卒奠罷用綌卽位而徹之加勺

鄭注覆壺者盥澀水且為其不宜塵霤用綌以其堅
絮禁言櫨者祭尚厭飫得與大夫同器不為神戒也
釋曰卒奠酌奠奠于銅南時即位尸即席坐時鄉飲
酒賓至徹霤禮器曰禮有以下為貴者天子諸侯之
尊廢禁大夫士櫨禁玉藻曰大夫側尊用櫨士側尊
用禁櫨無足禁有足士卑故以禁戒為稱櫨又曰斯
禁鄉飲酒鄉射雖大夫以非祭禮猶曰斯禁至祭乃
名曰櫨士祭禮言櫨禁得與大夫同名

籩中以綌也。纁裏束烝栗擇

鄭注籩有巾者果實之物多皮核優尊者可烝裏之也。烝擇互文。舊說云纁裏者皆玄被。

釋曰聘禮竹簋

案此下原本缺

銅芼用苦若薇皆有滑夏葵冬苣

鄭注苦苦茶也。苣苣屬乾之冬滑于葵。詩云周原膾膾苣茶如飴。今文苦為苣苣乃地黃非也。

釋曰內則曰苣苣以滑之

棘心七刻

鄭注刻若今龍頭

釋曰詩大東曰有捄棘七

牲饗在廟門外東南魚腊饗在其南皆西面饌饗在西
辟

鄭注饌炊也西辟堂之西牆下舊說云南北直屋枱
稷在南

肝俎心舌皆去本末午割之實于牲鼎載心立舌縮俎

鄭注午割從橫割之亦勿沒立縮順其性心舌知食味者欲尸之饗此祭是以進之

釋曰一從一橫曰午四面皆鄉中割之

賓與長兄弟之薦自東房其餘在東堂

鄭注東堂東夾之前近南

沃尸盥者一人奉槃者東面執匱者西面淳沃執巾者在匱北

鄭注匱北執匱之北亦西面每事各一人淳沃稍注

之今文淳作激

宗人東面取巾振之三南面授尸卒執巾者受

鄭注宗人代授巾庭長尊

尸入主人及賓皆辟位出亦如之

鄭注辟位逡遁

嗣舉奠佐食設豆鹽

鄭注肝宜鹽也

佐食當事則戶外南面無事則中庭北面

鄭注當事將有事而未至

凡祝呼佐食許諾

鄭注呼猶命也

宗人獻與旅齒于衆賓

鄭注尊庭長齒從其長幼之次

佐食于旅齒于兄弟

釋曰祭統曰凡賜爵昭為一穆為一昭與昭齒穆與穆齒及羣兄弟

尊兩壺于房中西牖下南上

鄭注為婦人旅也其尊之節亞西方

釋曰尊壺于西方已乃尊于房

內賓立于其北東面南上宗婦北堂東而北上

鄭注二者所謂內兄弟內賓姑姊妹也宗婦族人之婦其夫屬于所祭為子孫或南上或北上宗婦宜統于主婦主婦南面北堂中房而北

主婦及內賓宗婦亦旅西面

鄭注西面者異于獻也男子獻于堂上旅于堂下婦人獻于南面旅于西面內賓象衆賓宗婦象兄弟其節與其儀依男子也主婦酬內賓之長酌奠于薦左內賓之長坐取奠于右宗婦之娣婦舉觶于其娣婦亦如之內賓之長坐取奠觶酬宗婦之娣交錯以辯宗婦之娣亦取奠觶酬內賓之長交錯以辯內賓之少者宗婦之娣婦各舉奠于其長竝行交錯無算其拜及飲者皆西面于主婦之東南

案今注疏
本脫于字

宗婦贊薦者執以坐于戶外授主婦尸卒食而祭饔饔
雍饔

鄭注雍孰肉以尸享祭竈有功也舊說云宗婦祭饔
饔享者祭雍饔用黍肉而已無籩豆俎禮器曰燔燎
于饔夫饔者老婦之祭盛于盆尊于瓶

賓從尸俎出廟門乃反位

鄭注賓從尸送尸也士之助祭終其事也俎尸俎也
賓既送尸復入反位者宜與主人為禮乃去之

尸俎右肩臂臑肫肱正脊二骨橫脊長脅二骨短脅

鄭注尸俎神俎也士之正祭禮九體貶于大夫有併骨二亦得十一之名合少牢之體數此所謂放而不致者凡俎實之數奇脊無中脅無前貶于尊者不貶正脊不奪正也正脊二骨長脅二骨者將舉于尸尸食未飽不欲空神俎

釋曰尸餽鬼神之餘故謂神俎為尸俎也尸先舉正脊次舉長脅故皆二骨少牢饋食禮又有脰脊代脅

為十一體

膚三

鄭注為養用二厭飫一也

離肺一

鄭注離猶搯也小而長午割之亦不提心謂之舉肺

剗肺三

鄭注為尸主人主婦祭今文剗為切

釋曰尸酢主人主人不絕祭知用尸俎之剗肺

魚十有五

鄭注魚水物以頭枚數陰中之物取數于月十有五
日而盈少牢饋食禮亦云十有五而俎尊卑同此所
謂經而等也

腊如牲骨

鄭注不但言體以有一骨二骨者

祝俎髀胾脊二骨脅二骨

鄭注凡接于神及尸者俎不過牲三體以特牲約加

其可併者二亦得奇名少牢饋食禮羊豕各三體
釋曰脅蓋代脅也與脰脊皆尸俎所不備者

膚一離肺一胙俎臂正脊二骨橫脊長脅二骨短脅

鄭注主人尊欲其體得祝之加數五體又加其可併
者二亦者奇名臂左體臂

膚一離肺一主婦俎彘折

鄭注彘後足折分後右足以為佐食俎不分左肱折

辟大夫妻古文彘皆作彘

案今注疏本脫此六字

其餘如胙俎

鄭注餘謂脊脅膚肺

佐食俎觔折脊脅

鄭注三體卑者從正

釋曰無加骨也脊脅不名無定體

膚一離肺一賓骼長兄弟及宗人折其餘如佐食俎

鄭注體左骼也賓俎全體尊賓不用尊體為其已甚卑而全之其宜可也長兄弟及宗人折不言所分略

之

釋曰祝佐食接神賓三獻長兄弟為加爵宗人庭長授巾皆接尸而祝為尊故祝五體而餘皆三體衆賓長亦為加爵接于尸蓋亦三體下文惟衆賓敬脅耳衆賓及衆兄弟內賓宗婦若有公有司私臣皆敬脅

鄭注又略此所折骨直破折餘體可敬者升之俎一而已不備三者賤祭禮接神者貴凡骨有肉曰敬祭統曰凡為俎以骨為主貴者取貴骨賤者取賤骨貴

者不重賤者不虛示均也俎者所以明惠之必均也

案今注疏
本脫明字

善為政者如此故曰見政事之均焉公有

司亦士之屬命于君者也私臣自己所辟除者

釋曰禮器曰羔豚而祭百官皆足大牢而祭不必有

餘此之謂稱百官謂衆助祭者

膚一離肺一公有司門西北面東上獻次衆賓私臣門

東北面西上獻次兄弟升受降飲

鄭注獻在後者賤也祭祀有上事者貴之非執事者

亦皆與旅

釋曰擇公有司以為賓為衆賓位西階下執祭事其
不執事者則在門西兄弟雖無上事亦在堂下西面
族親故也宗人獻與旅齒于衆賓則公有司為之佐
食齒于兄弟其選于私臣與公有司私臣薦俎蓋徒
隸為之

